

Sistema Atensaun no Responde Sedu (AtReS) iha periodu Feveireiru-Marsu 2022 kontinua implementa servisu monitorizasaun ba insidente violénsia ne'ebé akontese, iha Munisipiu Baukau no Dili. Sistema ne'e hala'o tanba hetan parseria ho rede monitorizador sira iha baze atu halibur informasaun kona-ba insidente violénsia sira. Insidente ne'ebé rekolla, regulármente haruka ba koordinador Munisipiu sira hodi elabora hamutuk iha sistema baze de dados nasional liu husi online. Ekpa Jestor baze de dados iha nasional kontinua halo verifikasaun ikus ba dados refere no haruka ba Jestor programa hodi análiza ba kauza sira ne'ebé hamosu insidente ho violénsia ne'ebé akontese. Ba maluk sira ne'ebé interese atu hatene kle'an kona-ba dados insidente no atividade prevensaun konfliktu no harii dame iha comunidade ne'ebé akontese iha Timor-Leste, bele asesu iha [www.atres.belun.tl](http://www.atres.belun.tl)

Revista situasaun periodu Feveireiru-Marsu 2022, Sistema AtReS kobre deit Munisipiu 2 (Baukau no Dili) tanba NGO Belun hasoru difikuldade rekursu finanseiru, Belun sei alarga sistema atRes ba Munisipiu sira seluk uainhira hetan apoiu rekursu husi parseiru doadores ruma. Postu administrativu ne'ebé kobre iha Periodu ne'e hamutuk 7, mak hanesan Munisipiu Baukau kobre postu administrativu 3 (Baukau Vila, Laga ho Vemassee) no Munisipiu Dili kobre Postu Administrativu 4 (Dom Aleixo, Cristo Rei, Nain Feto no Vera Cruz). Parseiru monitorizador ne'ebé ativu hamutuk na'in neen (mane 5 no feto 1) mak halo monitorizasaun direita ba insidente iha terenu.

Dados insidente iha Munisipiu rua iha periodu ne'e ho deskreve hanesan tuir mai:

**ASUNTU NE'EBÉ PRESIZA TAU ATENSAUN**

- ▶ **Insidente Violensia Bazeia ba Jéneru (VBJ)**
  - **Violensia Domestika 18**
  - **Violasaun Seksuál no Asédiu seksuál, Soe Bebe no Tara-an**
- ▶ **Insidente Violensia tanba Disputa Rai 6**
- ▶ **Insidente 28 liga Krime Eleitorál iha Eleisaun Prezidensial**

| Insidente    |            | Total Insidente |
|--------------|------------|-----------------|
| Baukau       | Baukau     | 33              |
|              | Laga       | 9               |
|              | Vemassee   | 5               |
| Dili         | Dom Aleixo | 30              |
|              | Cristo Rei | 21              |
|              | Nain Feto  | 7               |
|              | Vera Cruz  | 12              |
| <b>Total</b> |            | <b>117</b>      |

**INSIDENTE VIOLÉNSIA IHA MUNISIPIU 7 PERIODU FEVEREIRU-MARSU 2022**

Belun ho nia Sistema AtReS iha periodu Feveireiru-Marsu 2022 hetan apoiu ho orsamentu husi USAID (Povu Amerikanu) liuhusi programa USAID/Timor-Leste NGO Advocacy for Good Governance Activity ne'ebé implementa husi Counterpart International ho naran Atividade USAID, kontinua rekolla dados insidente iha Munisipiu Baukau no Dili. Insidente ho violénsia ne'ebé akontese iha periodu ne'e hamutuk 117, Husi total Numeru insidente ne'ebé rekolla, kontinua hatudu porsentajen insidente ne'ebé boot liu iha Munisipiu Dili ho 60%, enkuantu, Baukau 40%.

Haree husi jéneru perpetrador, iha insidente 82 mak envolve perpetrador ho jéneru mane, insidente 6 mak envolve perpetrador ho jéneru feto, insidente 4 mak envolve perpetrador ho jéneru feto no mane, enkuantu insidente 11 mak la hatene perpetrador sira nia jéneru ka deskoñesidu.

Vitima husi insidente ne'e, mane 55, feto 32, no vitima feto no mane hamutuk 27, enkuantu insidente 3 la hatene nia vitima (estrage sasan no propriedade).

Insidente tuir Perpetrador sira nia pozisaun ka status sosial mak hanesan maioria perpetrador husi to'os no natar nain hamutuk 34, perpetrador nudar vizinu iha bairo hamutuk 28, perpetrador husi membru familia hela hamutuk iha insidente 26, perpetrador nudar familia hela iha uma keta-ketak hamutuk insidente 22, enkuantu perpetrador Militante partidu iha insidente 13, preparador nudar estudante iha insidente 12, perpetrador mai husi ema dezempregu iha comunidade hamutuk insidente 10, perpetrador husi arte marsiais hamutuk insidente 8, enkuantu iha insidente 4 perpetrador nudar ema deskoñesidu, iha mos insidente 3 involve perpetrador husi ofisial Governu, insidente 2 perpetrador involve husi mestre sira, perpetrador husi membru F-FDTL involve iha insidente 2, enkuantu insidente involve perpetrador husi membru konsellu suku iha insidente 1, veteranus iha insidente 1, jornalista iha insidente 1, no ema deskoñesidu iha insidente 1. Vitima sira nia knaar iha sociedade, Vitima husi to'os no natar nain hamutuk 31, Viziñu 26, nudar membru familia hela iha uma hanesan iha 24, membru familia hela iha uma keta-ketak hamutuk 21 membru arte marsiais hamutuk 13, ema ho dezempregu hamutuk 13, estudante iha 10 ema dezkesidu iha 9, la hatene vitima nia knaar tanba estrage propriedade hamutuk 8, vitima husi militante partidu Politik iha 8, ofisial governu iha 3, vitima husi mestre sira hamutuk 2, vitima veteranu iha ida, no membru konsellu suku iha 1

Sasan no material ne'ebé uza bainhira halo insidente sira maka hanesan, iha Insidente 74 uza isin lolon ezemplu. Hanesan liman, ain, nehan hodi tata, sst. Insidente 63 uza ibun hodi istori malu, haksasuk malu no diskute malu. Insidente 34 uza fatuk hodi tuda malu. Iha insidente 20 uza liafuan hodi ameasa malu, nomos iha insidente 2 uza Ai dona, besi kanu, sst.

Fator sira ne'ebé kontribui ba hamosu insidente, maka hanesan maioria Insidente akontese tanba liga ba Odiu vingansa no laran moras hamutuk insidente 69, iha mos insidente 57 ne'ebé akontese maibe ita la-hatene nia kauza insidente lolos, iha insidente 10 akontese tanba autor no vitima hemu tua lanu, insidente 8 kauza husi Problema kona-ba politika governu ka programa seluk, insidente 7 kona ba problema entre militante no simpatizante sira partidu politika durante periodu kampaña no prosesu eleitorál. Iha insidente 7 husi problema Asuntu adultériu (selingkuh), Insidente 6 husi Problema kona-ba deve osan ba malu, Insidente 6 Disputa kona-ba rai ba to'os, natar no rai ba uma fatin, iha Insidente 4 kona ba Asidente ne'ebé provoka insidente, insidente 3 Problema entre Grupu Arte Marsial (GAM), insidente 2 Lamentasaun seluk husi comunidade liga ba Polisia no Militar, insidente 2 Problema liga ba adat ka barlakeadu nomos iha insidente kona-ba deskonfia ka na'ok sasan, Disputa kona-ba asesu rekursus natural (bee, sst) no La kontente ho rezultadu eleisaun ka formasaun governu. Aleinde ne'e iha mos iha insidente violensia bazeia ba Jéneru hamutuk 33, hanesan violensia asaltu seksuál 1, asedu seksuál 1, tenta asaltu seksuál 2, violensia domestika 18, problema soe bebe iha insidente 2, mane baku feto ne'ebé laos nia familia hamutuk 9. Iha mos insidente ida feen sona nia laen.

Insidente hirak ne'ebé akontese no hetan intervensaun husi membru familia, viziñu, kolega sira, hetan intervensaun mos husi parte seguransa hanesan parte seguransa PNTL no autoridade lokal

sira. Maioria insidente keixa iha PNTL no kontinua halo investigasaun ho prosesu ba Tribunal, iha insidente balun rezolve liuhusi prosesu mediasaun.

Konsekuensia husi insidente sira ne'e, ema mate nain 4 (*mane 3 no feto 1*), ema kanek todan iha nain 2 (*mane hotu*), kanek kmaan iha 48 (*mane 34, feto 14*), ema sente la seguru no halai husi fatin insidente iha 10, uma ka propriedade hetan estragus ka sunu 2, uma ka konstrusaun aat 11, transporte estraga no sunu ka aat 5.

### VIOLENSIA BAZIA BA JÉNERU (VBJ) AKONTESE INSIDENTE 33 IHA MUNISIPIU 2

Insidente Violensia bazeia ba jéneru hamutuk 33, akontese iha Munisipiu Baukau no Dili iha periodu fulan Feveirur – Marsu 22, Insidente hirak ne'e ho nia karakteristiku maka hanesan:

- **Insidente Violensia Domestika**

Violénsia doméstika iha periodu ne'e akontese ho total insidente 18, Insidente 10 akontese iha Munisipiu Baukau no insidente 8 akontese iha Munisipiu Dili. Kazu violénsia doméstika hirak ne'e akontese tanba la satisfas ba hahalok entre familia sira iha uma laran, hanesan deskonfia malu komete adulteiru, tua lanu, problema ekonomia uma laran, komunikasaun livre iha MedSos, iha mos insidente violensia domestika balun ne'ebe akontese tanba laen obriga feen atu hili kandidatu Prezidente tuir laen nia hakarak, obriga malu atu halo relasaun seksuál maibé feen lakohi ho razaun kolen, istori malu tanba oan, istori malu osan la iha hodi sosa ai-han uma laran. Asaun violensia maioria hahú ho diskute malu uza lia fuan, tolok, halo agresauz fiziku ba malu, ate feen sona laen. Iha mós insidente ida mane oho-an maibé la hatene nia motivu. Husi insidente violénsia doméstika hirak ne'e kuaze vítima sira keixa hotu ba parte Polisia Nasionál Timor-Leste (PNTL) hodi kontinua prosesu investigasaun.

- **Insidente Violénsia Seksuál no Asédiu Seksuál**

Rezultadu monitorizasaun periodu ne'e hatudu katak, iha Munisipiu Dili Insidente violensia asaltu seksuál 1, soe bebe nia isin mate iha insidente 1, no joven mane ida halo asédiu seksuál iha insidente 1. Munisipiu Baukau enkuantu iha insidente, tenta asaltu seksuál 2, problema soe bebe iha insidente 1. Bebe ne'ebé ema deskoñesidu soe iha Suku Sagadate Postu Laga komidade konsege salva nia vida, enkuantu bebe ne'ebé ema deskoñesidu soe iha Fatin lixu iha area Fatuhada. Dili ho kondisaun mate, ate agora ita seidauk hatene lolos motivu husi kazu hirak ne'e no sei iha prosesu investigasaun Polisia Nasionál. Iha mos insidente 9 mane halo violensia (baku) feto ne'ebé laos nia familia iha fatin publiku.


### INSIDENTE BA DISPUTA RAI, BALIZA TOOS NO PLANTASAUN

Insidente violensia tanba asuntu disputa rai, baliza toos no propriedade hanesan plantasaun nu'u, iha periodu ne'e hamutuk insidente 6, insidente hirak ne'e akontese iha munisipiu Baukau no Dili. Motivun disputa rai hahu husi rai ba toos, natar, no rai baliza. Disputante iha relasaun hanesan familia no viziñu. Rezolusaun ba disputa rai refere liu husi rezolve iha uma lisan ho kultura, Mediasaun iha suku no kontinua keixa iha PNTL hodi kontinua prosesu tuir lei ne'ebé iha.


### Insidente 28 Liga Krime Eleitorál Iha Eleisaun Prezidensial

Periodu ne'e mos nudar periodu tempu eleisaun Prezidensial nia, nune'e movimentu partidu politika sira hahu halao atividade iha periodu antes kampaña eleitorál, iha tempu eleisaun no de pois de eleisaun, hamosu insidente 28 iha munisipiu Baukau no Dili entre militante partidu politik sira, insidente hirak ne'e rezulta ema kanek no estraga komidade nia propriedade. Kazu hirak ne'e PNTL kontinua investiga no prosesu ba tuir lei ne'ebe mak iha.


### GRAFIKU KARATERÍSTIKA JERÁL INSIDENTE




#### 4. AUTÓR NO VITIMA TUIR NIA IDADE




#### 6. FATIN AKONTESIMENTU




#### 5. AUTÓR NO VITIMA NIA POZISAUN KA KNAAR




#### 7. SASÁN NE'EBÉ UZA IHA INSIDENTE




### 8. EMA NE'EBÉ RESPONDE KA AKALMA INSIDENTE



### 9. IMPAKTU HUSI INSIDENTE



### 10. FATÓR NE'EBÉ HAMOSU INSIDENTE



### ATIVIDADE PREVENSAUN KONFLITU NO HARII DAME

#### Programa Atensaun no Responde Sedu (atRes)

Iha Fulan febreiru – Marsu 2022, Programa atRes hetan suporta orsamentu husi USAID liu husi Counterpart International ho naran Atividade USAID hala'o atividade introdusaun programa ba autoridade munisipiu no postu iha munisipiu Dili no Baukau, iha periodu ida ne'e mós ekipa Belun realiza Constituent Feedback Survey hodi hatene kona-ba impaktu implementasaun programa Belun iha munisipiu Baukau (Postu Laga, Baukau Villa no Vemasse) ho total respondente 160 husi aldeia 10 ne'ebé iha mahon postu administrativu ne'ebé mensiona nia.

#### Programa Ai ba Futuru

Fulan Fevereiru – Marsu 2022, Belun Liuhusi program Ai ba Futuru ho parseria hamutuk GIZ, halo enkontru inísiu ho autoridade governu lokál iha Munisipiu Baukau, Manatuto, Vikeke no Lautem ba apresentasaun no Introduz Programa Ai ba Futuru ne'ebé Belun sei implementa iha suku tarjetu hamutuk 20 sira ne'ebé identifika ona iha kada Munisipiu ho papel Belun ni'an iha formasaun, deziminasau informasaun publiku nomos survei.

Objetivu husi enkontru ne'e: 1) Atu hametin kooperasaun servisu ho autoridade kompetente sira iha nivel munisipiu, Postu no Suku hodi bele fó apoiu másimu iha implementasaun Programa; 2) atu apresenta planu atividade hodi hetan ideas no intervensaun ruma ba hadi'ak no hametin komunikaun no kooperasaun servisu iha futuru. Programa Ai ba Futuru hetan apoiu finanseiru husi Uniaun Europeia no governu federal Alemaña liu husi ajénsia GIZ ho parseria hamutuk Ministériu Agrikultura no Pesca.



### KONA-BA REVISTA NE'E

Desde Belun estabesimentu Sistema AtReS iha tinan 2008 to'o 2016, sistema ne'e konsege kobre Postu Administrativu 43 iha Munisipiu hotu, maibé ho limitasaun finanseiru ne'ebé organizasaun hasoru, iha 2017 sistema ne'e para provizoriu. Hahú reativa fali iha 2018 ho apoiu husi UN Women ho Programa Feto Pas no Seguransa ho area kobertura ba de'it iha Munisipiu Baukau, Covalima no RAEOA. Iha mediu 2019 (Maiu-Setembru) kobre tan ba Munisipiu Dili (iha Postu Administrativu 6) ho apoiu finanseiru husi DAP-DFAT. Iha tinan hanesan, ho apoiu Governu Alemaña, GIZ, sistema AtReS kontinua reativa fali iha Munisipiu 4, Dili, Baukau, Lautein no Vikéke (Postu Administrativu rua kada Munisipiu). Iha 2020 ho apoiu Sekretariadu g7+ reativa iha Munisipiu Likisá no ho apoiu UNDP nia Programa Sistema Justisa reativa tan iha Munisipiu Covalima. Iha Jullu 2020 tanba limitasaun orsamentu sistema ne'e paradu provizoriamente to'o Dezembru 2020 no iha tinan 2021 ho apoiu husi Rede Asia Pacific Partnership Atrocity Prevention (APPAP) no reativa fali iha tinan 2021 iha munisipiu 2 iha Munisipiu Dili (Postu Administrativu 2) no iha Munisipiu Likisá (Postu Administrativu 3).

Hahu fulan Jullu 2021 Belun hetan tulun orsamentu kiik husi Unidade Apoiu Sosiedade Sivíl (agora temi" SASCAS) iha mahon Gabinete Primeiru Ministru ho orsamentu governu tinan fiskál kontinua apoiu Sistema AtReS hodi tau matan tan Munisipiu Baukau (Postu Administrativu 3), Dili (Dom Aleixo no Cristo Rei) no Covalima (Postu Administrativu 3) ate fulan dezembru 2021, Tuir mai Centro Nasional Chega! I.P (CNC) apoiu tan hodi kontinua alarga sistema AtReS ba Munisipiu Ainaro (Postu Administrativu 3), Bobonaro (Postu Administrativu 3) no Manufahi (Postu Administrativu 3) ate fulan Dezembru 2021. ikus liu hetan tan apoiu husi Povu Amerikanu liuhusi programa USAID/Timor-Leste NGO Advocacy for Good Governance Activity ne'ebé implementa husi Counterpart International kobre Munisipiu Dili no Baukau, iha tinan 2022.

Revista situasaun ne'e relata kona-ba asuntu xavi relasiona ho insidente violénsia no tendensia husi dadus monitorizasaun liuhusi Sistema Atensaun no Responde Sedu (AtReS) Timor-Leste durante Feveiru-Marsu 2022 iha Munisipiu, Baukau no Dili.

### Informasaun kle'an liu iha [www.atres.belun.tl](http://www.atres.belun.tl)

Atu hetan informasaun kléan liutan, favor kontaktu:

**Luis da Costa Ximenes**, Diretór Belun, [luis.belun@gmail.com](mailto:luis.belun@gmail.com)

**Romaldo Caetano**, Jestór Sistema AtReS: [romaldo.belun@gmail.com](mailto:romaldo.belun@gmail.com)

**Laurenço Adelaide**, Espesialita ba Prevensaun Konfliktu, [lourenco.belun@gmail.com](mailto:lourenco.belun@gmail.com)